

Grasia bilong God i gutpela tumas!

Moning.

Grasia bilong God em i wanpela bikpela samting, na yumi save lukim grasia bilong God long olgeta hap insait long Baibel. Em olsem tasol grasia bilong God em i wanem samting? Tok “grasia” (*Tok Inglis “grace”*) em i wanpela sotpela toktok bilong diskraibim wanpela bikpela samting – tok “grasia” i save diskraibim *olgeta samting God i mekim bilong kisim bek (sevim) sinmanmeri.*

Tingim....

- Pastaim God i makim *planti* manmeri bilong kisim bek ol,
- na Em i givim ol long Jisas. Lukim **Efesus 1:4**.

⁴ Long bipo, taim God i no kamapim dispela graun yet, Em i bin makim yumi na pasim yumi long Krai bai yumi i stap holi na i no gat asua long ai bilong Em. Em i bin lavim yumi.

- Bihain Jisas i kam long dispela graun, na long laip bilong Em, na long dai bilong Em long diwai kros, na long kirap bek bilong Em long matmat, Em i mekim ol klin (strepela) long ai bilong God. Lukim **Efesus 3:12** na **1 Korin 1:30** (na yu ken i lukim Mak 10:45).

¹² Yumi ken i kam bek long God na yumi no inap sem o pret bikos Krai i bin feitul long mekim wok.

³⁰ God yet Em i as tru bilong laip bilong yumi i pas long Krai Jisas, na bilong yumi God i mekim Krai Jisas i kamap trupela save bilong Em. Em olsem na Krai Jisas Em i strepela pasin bilong yumi, na long wok bilong Em yumi kamap holi manmeri bilong God, na Em i rot bilong God i kisim bek yumi.

- God Em i adoptim ol (kisim bek ol) na Em i mekim ol i stap femili bilong Em. Lukim **Efesus 1:5-8**.

⁵ Na long dispela as Em bin i makim yumi bilong adoptim yumi na mekim yumi kamap pikinini bilong Em long wok Jisas Krai i mekim. Na God i bihainim amamas na laik bilong Em yet na Em i mekim ol dispela samting. ⁶ Na ol dispela samting i save givim biknem long grasia i bikpela na gutpela tumas bilong God. Na dispela grasia i fri olgeta na i kam long yumi long wok bilong dispela Man God i lavim tumas. ⁷⁻⁸ Dispela Man, long blut bilong Em, Em i baim pe bilong sin bilong yumi na yumi stap fri nau. Long dispela wei God i fogivim yumi long sin bilong yumi. Na dispela i soim yumi olsem God i kapsaitim grasia bilong Em moa moa long yumi.

- Na God i salim tok bilong Em long ol, bai ol i ken i harim gutnius bilong feitul wok bilong Jisas. Lukim **Rom 10:14-15**.

¹⁴ Tasol, hau na bai ol i singaut long BIKPELA sapos ol i no bilipim na trastim Em? Na hau na bai ol i bilipim na trastim Em sapos ol i no bin harim tok bilong Em? Na hau na bai ol i harim tok bilong Em sapos wanpela man i no bin autim tok long ol? ¹⁵ Na hau na bai wanpela man i autim tok long ol sapos BIKPELA i no bin salim em i go bilong autim tok long ol? Buk bilong God i mekim dispela tok, “*Lek bilong ol man i kam autim gutnius i naispela tru!*”

- Na Holi Spirit i kamapim nupela laip long ol, Em i opim ia na bel bilong ol, bai ol i ken i harim gutnius bilong feitul wok bilong Jisas. Lukim **Efesus 1:13-14** na **Efesus 2:4-5** (na yu ken i lukim Efesus 2:1-3).

¹³ Na yupela tu i pas long ol dispela samting bilong Krai taim yupela i harim tok i tru tumas. Dispela tok i tru tumas em i gutnius i tokaut long wok God i mekim long Krai bilong sevim yupela. Na taim

yupela bilip God i givim wanpela mak long yupela bilong soim olsem Em i bin pasim yupela long Krai. Na dispela mak em i Holi Spirit God i bin promisim. ¹⁴ Holi Spirit i olsem diposit bilong olgeta samting Krai i bin kisim bilong yumi na bihain yumi bai lukim. Em olsem na Holi Spirit bai i stap wantaim yumi manmeri bilong God inap long taim God i kisim bek yumi na yumi stap fri wantaim Em. Na God i mekim ol dispela samting bilong apim nem bilong Em i bikpela na gutpela tumas.

⁴⁻⁵ Tasol, taim yumi stap yet insait long ol kainkain rong na sin, na spirit bilong yumi i no gat laip, orait God Em i kamapim laip long yumi na nau yumi stap laip wantaim Krai. Na God i mekim olsem bikos God Em i God bilong marimari na bikos God i lavim yumi. Yes, God i mekim grasia na Em i sevim yumi.

- Em i givim bilip long ol, bai ol i bilipim na trastim God long kisim bek ol long feitful wok bilong Jisas. Lukim Efesus 2:7-8.

⁷ Na God i bin mekim ol dispela samting bilong soim olgeta jeneresen olsem, grasia bilong Em i bikpela na gutpela moa moa yet. Na dispela grasia i kamap ples klia taim God i mekim gutpela pasin long yumi long wok bilong Krai Jisas. ⁸ God i mekim grasia na Em i sevim yumi long rot bilong bilip. Yumi yet yumi no kamapim bilip bilong yumi. Nogat. God i bin givim bilip long yumi.

- Na God i holimpas ol, bai wanpela samting i no inap rausim ol long han bilong Em na wanpela samting i no inap separetim ol long lavim bilong Em na long wok bilong Jisas. Lukim 1 Korin 1:8 (na yu ken i lukim Rom 8:31-39).

⁸ Na God bai holim na lukautim yupela tu i go i go inap long pinis bilong olgeta samting, bai yupela i no gat asua long de bilong BIKPELA bilong yumi Jisas Krai.

- Ol bai sindaun wantaim Jisas long heven na amamas oltaim oltaim. Lukim Rom 5:2 na Rom 5:10 (na yu ken i lukim Revelesen 7:9-17).

² BIKPELA Jisas Krai, long wok bilong Em, Em i kisim yumi i kam insait long grasia bilong God, na long rot bilong bilip nau yumi i stap insait long dispela grasia. Na yumi save amamas. Long wanem, nau yumi klia olsem yumi bai lukim glori bilong God.

¹⁰ Bipo yumi birua bilong God. Tasol nau long dai bilong Pikinini bilong God Em i mekim yumi pren bilong Em. Em olsem na, nau Krai Em i stap laip na tru tumas yumi tu bai i stap laip.

Olgeta dispela samting em i grasia bilong God. Sapos yumi bilipim na trastim God long kisim bek yumi long feitful wok bilong Jisas, orait yumi ken i save olsem, *God* i bin makim yumi na pasim yumi long Jisas, na *Jisas* i bin mekim yumi klin long ai bilong God, na *Holi Spirit* i bin givim laip long yumi na i givim bilip long yumi.

Taim yumi stap sinmanmeri yet, orait God i wokim ol dispela samting bilong yumi (Rom 5:8). Yumi no wokim wanpela samting na God i kisim bek yumi. Nogat. God i wokim olgeta samting bilong kisim bek yumi – long stat tu pinis God i wokim olgeta samting – na long ol dispela wok bilong God, God i soim yumi grasia bilong Em. Yumi nogut manmeri, tasol God i mekim wok bilong kisim bek yumi. Yumi birua long God, tasol God i mekim wok bilong kisim bek yumi – dispela em i grasia bilong God.

Sapos yumi bilipim na trastim God long kisim bek yumi long feitful wok bilong Jisas, orait yumi ken i save olsem, grasia bilong God i sevim yumi – long grasia bilong Em God i kisim bek yumi.

Glenn.